



Jumat, 31 Desember 2021
Ogen: Masmur 27:11-14



Tetapkenlah Ukurndu!



Penutup wari-wari tahun 2021 semal kita pulung ras keluarga, orangtua, anak ras kempu-kempu. Meriah si akap sabap banci kita pulung ras kerina keluarga besarta si kin sewari-warina kita pedauh-dauh. Tupung kita pulung e lit si man inget-ingeten kerna pengalamen nggeluh si enggo si bentasi. Kimaun lit kebiaren, lit sakit pinakit, aru ate kerna anak sekolah, ekonomi si kurang, bage pe persadan keluarga si megati rukrak. Tapi kerina banci ibentasi amin pernah ndabuh i bas ndalanisa. Radu ras keluarga kita ngidah maka labo gegeh ras kebeluhenta ngasup ngalaken kerinana. Lit kepe Dibata si mereken gegeh ras kengasupen ngalaken ras mentasi kerinana. Seh ku penghujung tahun kita itaruhken Tuhan, tuhu-tuhu ban perkuah ateNa. Tuhan enggo ngaturken kerinana.

Bagem me penggejapen pemasmur i bas ia mentasi wari-wari kegeluhenna. La pernah ia itadingken Tuhan. Adi bapa-ras nande i doni enda banci nadingken ia, tapi Dibata la bage. Igejap pemasmur bas ndalani kegeluhenna enterem musuh si ngerimrim, si atena ngkernepen pemasmur i bas doni enda nari. Pemasmur la ernalem kempak kebeluhenna entah kempak kalak si gegehen asangkan ia, ernalem ia man Tuhan, ipindokenna maka Tuhan ngolangi ia i bas serangan musuh-musuhna nari. Tek kal pemasmur nandangi penemani Tuhan. Igejapkenna adi sedekah enda pe Tuhan enggo nemani, maka ku lebe enda pe uga pe ikawaliNa.

Nginget pengalamen nggeluh si enggo si bentasi, labo erkiteken kebeluhenta tapi Tuhan si negu-negu, teklah maka ku wari si reh enda pe Tuhan lalap nemani. Tetaplah ukur! Uga pe iberekenna gegeh lako ngalaken perbeben si mberat. Uga pe iolangina kita i bas serangan musuh-musuhta nari. Si perlu i bas kita nari e me, ernalem man Tuhan.